

Zvaničnici FBiH nisu uspjeli postići napredak u vezi sa imenovanjima sudija Ustavnog suda FBiH



Predsjednik i dva potpredsjednika Federacije Bosne i Hercegovine (FBiH) i Kolegij Doma naroda FBiH nisu se danas uspjeli dogovoriti o konkretnim koracima kojima bi se počeo otključavati proces imenovanja na upražnjena mjesta sudija u Ustavnom sudu FBiH i u Vijeću za zaštitu vitalnog nacionalnog interesa.

Nakon današnjega trosatnog sastanka u Sarajevu, visoki predstavnik Valentin Inzko je naglasio da ipak postoje koraci koji se mogu dogovoriti, a koji bi doveli do deblokiranja postojeće situacije, ukoliko bi se osobe odgovorne za popunjavanje upražnjenih mjesta u Sudu dogovorile i stavile na prvo mjesto interese Federacije i njenih građana.

Obaveza imenovanja sudija neće nestati i odgovornost je predsjednika, potpredsjednika i Kolegija Doma naroda FBiH da to urade. Visoki predstavnik je danas apelirao na njih da intenziviraju nivo svoje komunikacije kako bi došli do dogovora o daljnjem napretku.

„Niko od uključenih u proces nije bez krivice za činjenicu da ova temeljna pravosudna institucija ne funkcioniра u punom kapacitetu,“ rekao je visoki predstavnik Inzko dodajući da su

„u različitim trenucima u zadnje četiri godine sve ovdje predstavljene političke stranke igrale ulogu u opstruiranju imenovanja u Ustavni sud zbog svoje želje da postave sudije nad kojima mogu osigurati političku kontrolu ili utjecaj.“

Sada sve stranke koje su uključene u ovaj proces moraju na prvo mjesto staviti temeljno funkcioniranje institucija i interese građana Federacije. „Potreba za potpuno funkcionalnim Ustavnim sudom Federacije i Vijećem za zaštitu vitalnog nacionalnog interesa nikada nije bila veća“, rekao je visoki predstavnik.

Međunarodna zajednica ranije je izrazila svoje duboko nezadovoljstvo činjenicom da ključne institucije Federacije nisu popunile upražnjena mjesta na Ustavnom sudu Federacije i u Vijeću za zaštitu vitalnog nacionalnog interesa, te je pozdravila namjeru visokog predstavnika da okupi zvaničnike iz Federacije i od njih dobije informaciju kako namjeravaju postići napredak u rješavanju ovog pitanja.

Sastanku su prisustvovali predsjednik Federacije BiH Živko Budimir, potpredsjednici Federacije BiH Mirsad Kebo i Svetozar Pudarić, i članovi Kolegija Doma naroda Federacije BiH: Radoje Vidović (predsjedavajući), Jasmin Smailbegović (zamjenik predsjedavajućeg), Amir Zukić (šef Kluba bošnjačkih delegata), Mira Ljubljankić (šef Kluba srpskih delegata) i Luka Faletar (šef Kluba hrvatskih delegata).